

LOTUS SHAH ALAM JADI TUMPUAN PENIAGA BONET MINGGUAN

Oleh: Ayu Dina Qistiena



Suasana jualan bonet di parkir Lotus Shah Alam.

SHAH ALAM – Setiap hujung minggu, kawasan parkir Lotus Shah Alam berubah wajah menjadi tapak niaga terbuka yang meria dengan kehadiran ratusan peniaga kecil dan pengunjung tempatan.

Lebih 100 usahawan menyertai program *Car Boot Sale* mingguan itu bagi menjual pelbagai barangan dari bonet kereta masing-masing secara santai dan terbuka.

Konsep ini semakin popular dalam kalangan komuniti Shah Alam kerana ia menawarkan peluang perniagaan dengan kos yang rendah tanpa perlu menyewa premis kekal.

Peniaga muda, Aina Sofea, berkata peluang berniaga *di Car Boot Sale* sangat membantu mereka yang baru mahu mencuba dunia keusahawanan.



Antara gerai makanan yang menjadi tumpuan pengunjung di jualan bonet.

“Kalau nak buka kedai, modalnya besar. Tapi dekat sini, saya Cuma bawa barangan sendiri, buka bonet kereta dan terus boleh jual,” katanya sambil tersenyum.

Peniaga pakaian *bundle*, Fikri Ahmad, pula memaklumkan bahawa jualan pada hujung minggu kadangkala mampu mencecah sehingga RM400 sehari bergantung kepada jumlah pengunjung.

Katanya, sambutan pengunjung amat menggalakkan kerana mereka suka suasana santai dan pilihan barangan yang unik serta murah.

“Orang suka datang sini sebab boleh jumpa macam-macam, dari baju yang *rare*, barangan koleksi, sampai makanan ringan pun ada,” katanya lagi.

Antara barangan lain yang dijual termasuk hasil kraftangan, aksesori wanita, permainan kanak-kanak dan makanan buatan sendiri.

Pengunjung, Nurul Natasha, berkata beliau mengetahui tentang jualan ini melalui media sosial dan tertarik dengan konsep barangan *preloved* yang dijual dengan harga mampu milik.

“Saya suka barang-barang *bundle* sebab kualiti masih elok dan harganya jauh lebih murah, jadi saya datang hampir setiap minggu,” katanya sambil membelek pakaian di salah satu gerai.



Peniaga memanfaatkan ruang parkir untuk menjual pelbagai barangan.

Selain aktiviti jual beli, suasana mesra dan interaksi antara peniaga serta pelanggan menjadikan program ini lebih bermakna kepada komuniti setempat.

Wakil penganjur menjelaskan bahawa inisiatif ini diadakan bagi memberi peluang kepada penduduk sekitar Shah Alam menjana pendapatan tambahan serta memperkukuh semangat keusahawanan tempatan.

Lotus Shah Alam kini bukan sekadar pusat membeli-belah, tetapi turut menjadi simbol kepada kebangkitan ekonomi komuniti yang digerakkan dari peringkat akar umbi.